



Terenga 3: Hōtaka 43 – Kīwaha

He Mihi

E te hunga tōngakingaki, nau mai anō ki tā tātou hōtaka whakamairanga i te reo rerehua i waiho mai ai e kui mā, e koro mā hei mīrā, hei raupī mā tātou.

Hei Mahi Whakarongo

Nō tātou te whiwhi i te whakaaetanga mai o te whānau o Pūkana me Cinco Cine kia pāhotia anō tētehi o ā rātou pao hei mahi whakarongo mā tātou i te rā nei. Ko Herea Winitana te kaitito. Ko tana karangatahi me tana tuahine ana hoa waiata i te pao e haere ake nei. Anei ngā pātai hei whakautu mā koutou:

- 1) He aha ētehi kupu huarite i rangona ai i te wāhanga tuatahi?
- 2) He aha te kaupapa o te pao nei?
- 3) He aha te wāhi ki ngā whakaahua hei tautoko i te kaupapa nei?

He Whakamārama

Ko te kīwaha o te rā nei ka whakamahi i ngā kupu '**ka mahue**' hei whakakapi i te wāhi ki ngā kupu '*should've*' i te reo Pākehā. Ko te wairua o te kīwaha nei, mena i mahia tētehi mahi, kua kore i puta tētehi raruraru.

Anei tētehi tauira:

- Ani: Mō taku tōmuri. I raru taku waka nō reira i mate au ki te hīkoi mai ki te mahi.
Pita: Aiii! Ka mahue tō waea mai.

E mārama ai koe ki te tikanga o te kīwaha nei, anei ētehi anō whakamārama:

1. Kāore a Ani i waea ki a Pita.
2. I wātea a Pita ki te āwhina i a Ani.
3. Ko te whakapākehātanga o tā Pita kōrero e pēnei ana, '*Oh! You should've rung.*'

Hei Mahi

Whakapākehātia ēnei rerenga. Whakamahia te kīwaha o te rā nei.

1. You should've told me!
2. He should've left a message.
3. They (3) should've followed our (2) car.
4. I should've left home earlier.
5. Te Rangī should've listened to the instructions more closely.

He Whakautu:

1. Ka mahue tō kī mai.
2. Ka mahue tana waiho karere.
3. Ka mahue tā rātou whai i tō tāua/māua waka.
4. Ka mahue taku wehe moata mai i taku kāinga.
5. Ka mahue tā Rangī āta whakarongo ki ngā tohutohu.